




14  
1666  
22





Faint vertical text columns, likely bleed-through from the reverse side of the page.



門  
號 1666  
卷 22

陶菴集卷第十九目錄

五言律詩

京口舟中 螢 朱魚 登石湖諸山 半塘寺  
四檜 舟行九峰道中 登泖埭作 松陵晚眺  
登堯峰寺 夜泛鴛湖 水勢 泛舟西湖 韜光  
寺 石屋 謁于忠肅公祠堂 渡錢塘江 富陽  
城晚眺 桐君山 登釣臺 七里瀨 蘭溪道中  
龍游驛弄大樹數十章美而賦之 山村 停舟  
草萍驛有感 玉山道中 衢州 過廣信間鉞  
山寇警 月夜與諸子泛舟 過彭蠡湖 五月端  
午 泊舟 反憶 舟曉 舟晚 舟夜 烏江望  
霸王廟 自建業至京口或行或泊卽事成詩 舟  
雨 舟過梁溪 登惠山椒望太湖 梁溪道中喜

早稻田 大學 圖書館  
照 28.9.7 丈  
藏 書

雨 發自段橋至龍潭二首 冒雨入石頭城宿廣  
成銓部邸中 送張介茲會試 水仙花 鶴 晚  
鐘 王昭君 宿南有堂有感賦呈龔儉化 贈龔  
得初 元日席上詠餅梅 送許子位再遊江右  
壽王煙客太常五十 遊王氏園亭 李舜良拏舟  
相送 虎嘯待濟 晚泊示彥舟 疊舟韻示彥舟  
冬日 靜夜 病起書懷 閒居 壬午長至日  
送陳世祥省親常山 寒月和嚴式如韻 鄭超宗  
月夜過予旅舍有詩見贈次韻二首 超宗見示憶  
家山櫟樹詩次韻二首 題李太白象 白日 過  
石門作 雪中過丹陽不得泊有懷葛蒼公 銀山  
寺 得鄭超宗嚴式如寄懷詩次韻四首 送李廣  
文改任靈壁 送徐君遊燕 痛哭三首

陶菴集卷第十九

五言律詩

京口舟中

微風山磬落小艇與煙平棹發魚龍氣人隨日月行四維  
形勝辨一作一葦古今爭擊楫知何向一作誰是洪濤薄莫一作  
夜磬

螢

旅夜風鐙滅疏螢亦有情對飛開更闔獨坐晦還明書卷  
如憎少房櫳只益清井闌相似處歸夢最能生

朱魚

為與凡魚異翻合尺水藏數頭成伴侶半豹具文章遠害  
身長活娛人趣暗傷好投空闊去爾我本相忘

登石湖諸山

春水渾無際吳天總欲浮花疏時近眼柳弱不依洲醒酒  
山風急看碑野寺幽提攜佳侶在吾豈負雙眸

半塘寺

半塘禪寺古屈鐵變膠枝白業三生力蒼煙六代思法衰  
龍象至經妙鬼神悲寺有勝國善繼上人血書華嚴經一悟真空理滄江  
月上遲

四檜

在虞山道院本七檜今存四焉相傳有方士役鬼  
神移至

碧殿陰風入蒼蒼四檜存雷燒爭拗怒鬼見盡驚奔雲氣  
生高蓋龍蛇守直根只愁移卻去何物鎮山門

舟行九峰道中

澆舟蒲葉內聒聒水鳴溝緩棹知魚樂看山散客愁漁歌

風外接農務雨岸修野色紛如此吾行任去留

登泖埭作

拾級上秋雲中流勢不羣地擬吳會遠山似潤州分納納  
歸於海茫茫但一雲滄桑傳舊事風外悟磬聞

松陵晚眺

日莫登臨眼孤城也自睡湖多天在水邑小市侵橋芳艸  
歎寺路綠楊驚舊條望中唯燕子與客共飄飄

登堯峰寺

石壇幡影落一徑入堯峰竹暗雲生壁沙虛水應春鶴聽  
林外梵猿赴會時鐘風雨天南黑陰崖有伏龍

夜泛鴛湖

積水月涓涓月斜舟稍岸歸漁搖艇火宿鷺定湖天遙指  
埭相對暗尋花滿煙峰巒無一點吾醉獨蒼然

水勢

水勢沄沄大峰文午午浮春風隨處著花氣逼空流曲岸  
斜陽轉長天去鳥愁十年疲物役俯首媿滄洲

泛舟西湖

碧水風吹皺朱塵雨浥清纖歌何處接慢舸不知行駿馬  
盤隄疾珍禽坐樹輕夕陽何淡淡山氣莫能名

韜光寺

鷲嶺摩天碧峰峰虎豹文蛟宮枿木蔽僧竈水筒分石迸  
林中兩江飛海上雲高樓吟復笑倘有駱丞間

石屋

蘇子曾遊處畱題剝蘚花春蒸崖腹潤石迤履痕窅童子  
憂深入山僧許暫家經奇聊一歎腳腳近龍蛇

謁于忠肅公祠堂

澶淵非甌宋代邸本安劉力竭山河在功成骨肉憂艸銜  
兔血碧江挾怒潮流雪涕荒祠下乾坤正可愁

渡錢塘江

伍相鴟夷去錢王畫錦空英雄如昨日陵谷自春風白鳥  
沈煙外蒼山立雨中布帆輕轉怒長嘯對魚龍一作空濛

富陽城晚眺

浙西天漠漠片雨富陽城遠嶂千鬟妙長江一掌平風檣  
爭薄莫煙柳報清明鄉思縈覃葛萋萋艸又生

桐君山

桐君丹室在天下幾人間碧瀨長歸海清風獨滿山花開  
遊子路雲泊野僧關歎息鐘聲內仙禽自去還

登釣臺

石壁漢時煙巖祠風颯然雨流巖下釣一作雨添星動澤  
松頂瀑

中天地坼芝英瘦山空鳥跡元一邱難濟世不敢慕苒賢

七里瀨

孤舟落何處一作逆流方緩山水四一作忽周遭水鬪濼洄急山

含寂寞高中流明彩蛤夾篠墜蒼猱遊者非康樂長吟亦自豪

蘭溪道中

莽莽蘭溪雨孤帆迷所之斷崖爭榜急逆水打灘遲身世占風慢山河老鬢絲垂堂間有戒淹泊迕心期

龍遊驛舟大樹數十章美而賦之

龍蛻千年骨何人擲道有合圍猿臂短穿穴兔絲長布葉千家靜交柯六月涼丈夫存節日愛爾亦昂藏

山邨

麥秀先吳地花開類楚源農冠裁竹葉山井破桑根斫漆

猿爭樹燒林虎決蹠一邨驚客過蠻語共喧喧

停舟

停舟屢近山尋步夕陽閒流水將心去空煙與日還對飛沙鳥白低去竹雞斑幽絕無人領峰巒只自閒

艸萍驛有感

百年孫燧節一決守仁功箕尾歸天上麒麟入畫中暗苔詩壁古大樹驛亭空無限胸中氣時危哭向風

玉山道中

懷玉山邊路蕭蕭離越中百層嵐挂眼一雨翠連空鳥道危城旆人煙古驛風子規終日響憶殺是江東

衢州

山店依城斗官橋繫艇齊嵐光含野淡灘響隔春低雨暗虬龍宅春濃橘柚隄三衢風物好坦步不煩藜

過廣信間鉛山寇警

十年關陝亂江表不聞兵稅急農臣苦年荒米賊生斧柯  
誰在手牛犢漫多驚失涕蒼生內何時見太平

月夜與諸子泛舟

闔閭城外月帝子閣邊舟悵望壽人去經過爛醉休春陰  
收大澤元氣滿中流勝絕驚飄泊狂歌緩白頭

過彭蠡湖

推篷收宿雨送眼入巉巖慢水雙搖櫓橫風兩使帆緩行  
鳧得侶疾走馬辭銜落落中流坐匡廬大不凡  
梅天風不正白雨一喧豗長日春春去扁舟箇箇來波紅  
漁火重月黑蚌珠開堅坐看江表湖山亦壯哉  
牛背飢鳥立槎頭戲鱖跳投竿驚欲亂丸飲啄還騎白處  
拳飢鷺青邊掣怒鵬無心成搏擊偷眼避風颺

逆曳風帆過湖中拍浪兒輕儇沙鳥似猥惡海童爲百斛  
舟何重連晨漿未移閒思強弩手一破巨魚鬚  
楚俗尊祈賽龍神氣色殊分風勤客子割肉醉師巫筋吹  
殷膠轄雲車颯有無康山遺廟在血食想雄夫  
大湖流不盡盡處夕陽平山遠皆遺夢天多不覺行高帆  
吹嶽影驟鼓發江聲曳曳薰風至南雲一半晴  
水分南紀盛山挾大湖雄舟楫三苗俗鳧鷖萬里風豫章  
元自合江漢已先通禹貢猶沿誤書生莫鑿空

五月端午

三年端午日兩度客中過酒憶金陵美山看彭澤多枕欹  
書斷續囊久艾消磨莫笑鄉心勇黃魚壓子鵝江右風俗是日飲蒲酒噉鶯多因憶吾鄉  
石首魚了不可得

泊舟



單舸時時泊浮雲故故長浪兼鳧拍岸風引燕迴檐穀雨  
罷收艾田歌間插秧江南好風景留眼看吾鄉  
久客知風信江稀善倒奔報晴銅角響占雨紙鐙昏官舫  
人看顰孤村井汲渾東流山縣近往往識方言

反憶

漸遠江西道吟詩反憶渠長徽黏巨鯉小甕破浮蛆黃潤  
絺堪著青勻紙愜書客遊難唾井無奈是匡廬

舟曉

曉帆風力正秋浦望何長飛鳥沈空翠初暎似夕陽江開  
紫磨鏡山涌白毫光指點煩舟子王城一氣尙

舟晚

落日明離錦山光不可圖青冥隨遠近飛動入虛無漸背  
津亭小微分水樹孤船窗招月看江色澆驪珠

舟夜

大風搖獨夜遠夢斷孤舟不盡江濤涌分明此際愁長身  
艱負米柔翰想封侯揜盡窮途涕無端更一流

烏江望霸王廟

英雄垓下盡尺土占江濱虎失關中勢龍噓霸上雲人憐  
公百戰鬼闕漢三分薄莫風濤惡疑崩鉅鹿軍

自建業至京口或行或泊卽事成詩

憶昨龍潭驛山櫻繫馬紅事隨風雨過身復畫圖中白日  
園陵氣青天江浦烽向來憂樂地艸艸媿萍蓬  
龍吟江漠漠壘浪隱蠻雷繫纜吹還解崩沙過復迴蘆人  
收網去水母劃波開一葉投何所顛危亦甚哉  
有岸皆相似無端復一雷風蘆藏小店山火伴孤舟隔夜  
占雲氣從葑數傳郵遙遙京口市吳酒滑如油

江上復江上盡知洲渚情颶風兼日泊羈思一舟盈夏木  
蚤蟬細夕陽歸鳥明臨流聽吹角古堞有餘清  
中土奔封豕抽兵及四方西江驚早魃殺稼到吾鄉士喜  
交綏免農憂齧骨忙旅懷元易感聞此一旁皇  
金山勢不羣中流蹴浪分石鏡千帆影浮圖一握雲潮通  
僧井出鐘過海天間幾度登臨客長歌又水濱

舟雨

小雨瀟瀟燠因風灑舳艫鳴喧聽欲亂江碧看如無岸柳  
遙知重溪漁近覺孤泊舟疑蚤晚鄰舫更相呼

舟過梁溪

昨路邇迥甚茲晨一鳥過汲泉人語雜陶器野煙和山近  
城合黛江清水映羅臨風想形勝僞將管橫戈

登惠山椒望太湖

新晴宜縱覽薄莫勇躋攀湖迴浮餘地雲垂接斷山征颿  
殊不動落日勢將還擬放扁舟去人今且未閒

梁溪道中喜雨

旱乾逢好雨客路轉清新山碧蛟龍見江渾鯢鮒伸病輕  
霑手足褰改潤衣巾緩我歸舟樂看他插蒔頻

發自段橋至龍潭

溪谷風何緊濃陰亦未收礮車雲出大銀竹雨來稠木末  
援呼侶泥中客掉頭人煙一蕭瑟稍喜似涼秋  
衝雨橋難上捫幽徑別穿偶逢雲過嶺一似釜生煙鳥白  
林邊識榴紅澗底然旅懷振觸甚吟穩向江天  
積鐵崖根擁噴瓊地脈侵江山生處僻車馬入來深虎落  
三家店漁磯萬柳陰小安成旅次風半復幽尋

冒雨入石頭城宿廣成銓部邸中

陶菴集卷十九  
七  
棧車行石罅急雨勢多端方午戎戎暗如春側側寒來逢  
關吏識別喜故人安酒綠燈明裏羈魂尙未乾

送張介茲會試

公超辭下邑平子入西京賦就人爭寫經傳市輒成花濃  
春走馬風急夜論兵目送雲霄去窮交意氣生  
十年長帶甲滿野自蜚鴻林岬甯無歎當途便不同靜知  
天下事貧見丈夫雄莫負生平意臨軒答至公

水仙花

小徑誰曾踏寒芳已著花氣清春自遠姿淡月難加不采  
憐幽素盈畦任整斜彼姝貞未嫁持贈豈云差

鶴

天外一垂翅風霜奇水湄近人猶見野得性未安卑苔雨  
穿林滑溪冰啄月遲高人將縱汝謀會亦何爲

晚鐘

落日下巖阿疏鐘動夕波一從心地省如向此中過響盡  
諸天肅綠空半偈多杖藜猶佇立涼月滿煙蘿

王昭君

蛾眉應受妒畫手獨何人一見能生悔君恩此最眞微軀  
甘出塞大計惜和親試向邊城問長纓是漢臣

宿南有堂有感賦呈龔儉化

林黑更初遮牆高月欲沈長眠雷化雨半榻印同心夢憶  
他年火聽殘屋後禽堂爲我師行之先生講學處涪耀昆季嘗弦誦其中遺編憂墜  
絕相與慎追尋我師易解六脫稟涪耀極爲服膺

贈龔得初

世澤君宗久礪城弟一家傳經擁皋比奏議箸清華啟秀  
文章貴持躬孝弟嘉繼承須努力先業耀青霞

元日席上詠餅梅

小院初萌蕊深堂已報梅  
揀枝將畫比畱蕊入餅開林遠  
香微接鐙搖影忽來已拌雙鬢似催取百花杯  
獨笑知無侶頻移惜未安雪畱殘歲白春共一窗寒色倍  
蘭筵靜香連柏葉乾醉來渾爛漫髣髴在林端

送許子位再遊江右

章門一水通此去又春風嶽翠疑新長江光只舊空客愁  
醇酒外鄉夢落花中一路山櫻靄君應馬首東  
三載南州別翻如憶故鄉風旆送知己事後惜流光山雨  
鈴齋冷檉花驛館香祇應題墨處雲木日蒼蒼

壽王煙客太常五十

曼容辭爵祿疏廣入丹青戶映珠三樹家傳帶萬釘  
魚樵新友社後鶴舊山靈料得金門裏時時望歲星

已成洪上築都棄漢陰機拂席山皆響開廚畫欲飛  
玉蕤纓籜笠金盃醉漁磯  
比較牆東老人今遯更肥  
百歲方強半其如難老何  
黑頭明鏡滿顏玉  
輒顏多上客吟叢桂幽人送好鷺  
坐繡花萼集樂事許誰過

遊王氏園亭

入門朱夏改取徑綠溪長  
有地陰常合無風竹亦香  
獨行詩侶誤緩坐後遊忘  
愛此不能住驅車九陌黃

李舜良拏舟相送

袞袞行相聚情惜惜此離  
片帆弄日雨斗酒大江湄  
新漲千里盛孤雲薄莫奇  
心懷各有以侔子秋風時

虎嘯待濟

帆落非難上舟輕不易過  
漢家財賦重吳市賈人多  
細雨漁張網斜陽客綻蓑  
大江弄去闌鼓柁聽勞歌

晚泊示彥舟

吳趨今古道江上往來舟泊處皆如昨予心那不愁雲山  
瞻北極烽火戒南州與子觀垂釣臨淵亦有謀

疊寄韻示彥舟

童僕吾何得親知子共舟翻因同好聚喚此越鄉愁躍馬  
輕千里遊山慕九州平生出處意思共曩賢謀

冬日

我生勞造化尸寢未云甯東帶先朝日褰幃荷早晴同分  
簷隙照獨見野人情陽氣冬春遍冰霜亦暫生

靜夜

寂然生眾動風緒到寒林虛室不離我明燈欲照心杯香  
無晤語書擁信謳吟觸物天機內何須問淺深

病起書懷

閉戶彫羣木渺然歲月過自憐爲疾久不復使情多倚樹  
莫禽集曝簷初日和本無閒散意聊此慰蹉跎  
舊厭書籤少新知藥味多就閒慚子職因病貴天和道欲  
依平澹言先戒沓拖樂幽初見性不獨避風波

閒居

木落夫容笑端居習臥遊好風催展卷清旭照梳頭淡蕩  
操文筆蕭森激素秋劍纓俱未請吾黨自應羞

壬午長至日送陳世祥省親常山

省覲仍遊學天涯只似歸交新移舊雨寒盡接春暉瀧急  
風帆怒鷗多客思微鈴齋如憶我霰雪滿征衣

寒月和嚴式如韻

時寓京邸

坐訝一庭雪起看星斗橫難窮千里目未減九秋明高燭  
翻無焰濁醪吟有情隔簾風不起空際自多聲

鄭超宗月夜過予旅舍有詩見贈次韻二首

芳鄰兼夙好晨夕互敲門共被時人笑彌令古道敦清冰  
疑素簾寒月湛空尊中夜聞高詠猶疑謝朓存  
論心同永夕勸影各三人平子愁何甚嵇康嬾是真評疏  
慚澗壑交淡得松筠莫負尊時意相期立此身

超宗見示憶家山楸樹詩次韻二首

惟南有珍木想象一林霜日映金膏重風吹葍葉香丹青  
圖不到闌檻護多方攜取雙柑比應輸氣味良  
枝枝存綠緝縶縶結崢嶸月地看無隙風窗撼有聲采山  
通遠夢譽樹感嘉名忽憶江梅發鄉心亦暗驚

題李太白象

空梁月色流八極想神遊妙手傳遺象清風灑素秋蠻牋  
七寶榻紗帽木蘭舟一去人間世茫茫飯顆愁

白日

白日公然瘦青天不復高頽垣無鼠立廢壘有狐嗥亂過  
民生賤兵殘賊勢牢遺黎相對語毛髮尙騷騷

過石門作

石門投宿處冠劍想當年時事有今日津梁無此賢蓬飛  
陰雪上艸立勁風奔去去逢搖落楊朱涕泣然

雪中過丹陽不得泊有懷葛蒼公

契闊遠相望迴舟一笑妨孤城深雪閉寒雁莫情長世亂  
羞刀筆人高想釣璜可憐雙鐵硯靜倚一繩牀

銀山寺

古寺山之隅天然好畫圖步隨雙白鳥忽遇一僧雞木落  
齋鐘遠煙青雪嶼孤不知鄧開士倒立半空無

得鄭超宗嚴式如寄懷詩次韻四首

溪翁來栗里鷗鳥識斜川丈室饒容膝低垣甫及肩無文  
仍學豹有口不言錢嚴鄭知吾意相思坐隔年

一昨長安酒如鯨吸百川權門爭迨指爾輩官摩肩世事  
如談虎行藏等意錢山中漏茅屋小住足經年

天畔雙魚至春風綠滿川獨吟悲舊雨對簪憶詩肩雪片  
飛千里行囊賸一錢離歌如昨日彈指已新年

燕地風吹雪黃河冰塞川雲山一蒿目朋友兩隨肩待詔  
應長餓吟詩好賣錢天涯懷二子吾道屬寒年

送李廣文改任靈壁

函丈移何處秋風到宿州戰爭新壁壘弦誦古風流怪石  
連齋圃清淮繞郡樓獨知濠上意莊惠羨斯遊

送徐君遊燕

吳苑新歸客春風又薊門毳裘經雪時玉劒插腰溫樓護

一言重陳遵四座喧男兒意氣在莫漫受人恩

痛哭三首 甲申三月

舉首天如夢傳言痛入心九流真混濁人表竟平沈弓劍

橋山遠虹蜺帝座深少康今播越何國是斟尋

妖狐陳涉黨□□祿山兵□□才猶下蟲沙變偶生盜糧

齋□□民命賤牢姓將相謀如此皇天豈有情

天子十五葉皇朝三百年陷牀驚玉座失滄到銅仙李賀金銅

仙人辭漢歌憶偽詔公然艸南冠且望全真成書種絕江

海重潸然

陶菴集卷第十九終

順德龍鳳鏤校琴

陶菴集卷第二十日錄

七言律詩

蚤春柬友人 歲莫閒居 同侯雍瞻沈彥深張子  
宣鄭希孟時聖昭泛舟有作 贈徐將軍 人日集  
沈彥深齋次韻 次韻酬別張子石 遊石鐘山  
采石磯 遊甘露寺 張貞白有離世之志作四別  
詩示子予反其意作四畱詩以尼之 送張子石再  
遊江右 正月三日飲爾宗齋畱宿次韻 夏日錢  
牧齋先生攜同泛舟尚湖 九日登虞山遇雨宿興  
福禪院 送嚴式如遊武昌 次韻寄酬侯生雲俱  
見懷 新晴訪桂 訪隱者郊居 張母七十壽詩  
壽陸春園六十 贈時用咸入洋 壽潘汝躍六  
十 和龔儉化寄懷原韻 和龔仲和登高原韻



新春喜葉石農至 春風 春雨 讀鄭思肖心史  
 送子石遊燕 過露筋祠口占 京邸送龔智淵  
 南歸 喫黃芽菜作 南還至杜生村阻雪王孟衍  
 見示所和坡公鹽字韵詩次韵八首 孟衍有詩見  
 示復疊韵 雪晴蚤發杜生村至李家口疊韵  
 三首 臨胸道中微雪復疊韵 遣興 道旁見  
 出獵者 觀逐兔作 宿遷入舟作 瓜洲阻風遇  
 雪復疊鹽字韵 哭程孟陽先生次金爾宗韵 過  
 魯獨遊沂水上慨然有作 寄懷鄭超宗同年 偶  
 棲卓錫菴次程偈菴壁間韵 長至日再疊韵  
 甲申除夕感懷次廣成先生韵 乙酉元旦次廣成  
 先生韵兼呈雍瞻 六日對雨再疊韵 眉聲座  
 上見翼王和元旦詩復疊韵二首 新春喜陳嘉

自婁東至 送陳元晉分教歙縣

陶菴集卷第二十一

七言律詩

蚤春柬友人

東風乾鵲噪簷牙  
步愛青天好日華  
心似蚤梅能不放  
事如春水漫無涯  
文章漸老看飛動  
朋好相諳恕過差  
欲共論詩無美酒  
聞君穉子最能賒

歲莫閒居十首

燕坐高齋也自聊  
長檠短晷兩蕭蕭  
簷梅背日遲開坼  
窗竹含風細動搖  
事外琴書長有寄  
閒中苜蓿倍難消  
丈夫豈忘流年歎  
欲向何門做黑貂

朔風烏鳥噪江村  
裋褐看來衣綫繁  
獻賦十年思奉檄  
翳桑三日欲何言  
雪埋北戶驚萱艸  
春遠南陔續斷魂  
中夜五情還剝裂  
可憐絲絮定奇溫

攤書曝背小窗中間研冰開宿火融偶好器之真鐵漢兼  
評龐統半英雄道存一室安能埽世亂歧途只益窮棄置  
牆東君莫問年來筮易總成蒙

睡美茶甘合有魔蘇端酒好亦慵過世情久怕驚蝴蝶病  
體難移疥駱駝夢少卻占心正定腹便唯為飯摩挲書籤  
把出風簷讀野馬塵埃日日多

見說年豐百穀成四方窮苦更無名錢刀滿地騰魚米銀

海何時洗甲兵烽照劔門天下險地爭襄漢古今情聞賊有窺

蜀之志又近寇鄖襄東南王氣蟠龍虎金翅防江莫漫輕

風破林垌野望長故人小隱在寒塘貧來蹤跡如溪友老  
去詩篇似漫郎大布每縫諸弟被天吳近坼小兒裳何時  
買宅成鄰並十畝春陰共課桑

行過宿艸也堪悲白水青松好為誰排難祇今無籍福論

交自管長袁絲刺雷懷底都忘滅膝炙車中不耐追莫怪  
書生偏鈍直君房未易許相知

頭顱三十但離經多媿吾生見甯馨元末就時堪笑白藍  
當出處已為青三年鍊賦耽香艸一畫忘言想負蒼安得  
百原山雪內破除間見坐空冥

昨夢深山杖短筇羽人飛步亦相從峰巒拔地九千仞雲  
霧攙天五鬣松覺後晨鐘餘几席起來啜粥數遊蹤東南  
名勝何曾領布襪青鞵枉自縫

花外欣欣獨撚髭角巾行拂屋簷敲欲尋凍蕊驚先發暫  
數飛鴻覺暗移藥裹茶巾隨臘換山樓水檻與春期此心  
自信無拘束天命由來不我欺

同侯雍瞻沈彥深張子宣鄭希孟時聖昭泛舟有作  
春晴酒輒信經過陶峴移舟蕩綠波雍瞻一舟名峴仙飲痛豫拌

三日病杯行同作十分多岸花半發如人笑溪鳥爭鳴似  
曲和夜自欲關歸自緩羅衿玉佩柰君何

贈徐將軍

奇材劍客古無儔晤語從容即道流塞外聲名傳臥虎吳  
中結構比蝸牛萬金良藥隨人乞一卷戎韜為國畱我亦  
生平懷片氣與君高處望神州

人日集沈彥深齋次韵

臘酒開嘗勝老春春盤縷切鬪鮮新已邀名飲娛佳日旋  
詠清詩向醉人高院張鐙延素月廣庭積雪禁微塵儵然  
似泛虛舟去況對長魚憶釣緡

次韵酬別張子石

百丈牽江一綫平勞君客裏念歸程即看去住誰能料可  
是分離莫漫輕白鳥背飛星子驛朱旗遙颺石頭城船窗

日把詩篇坐香艸含風處處生

遊石鐘山

步追飛鶴過山頭俯見青黃正合流山下為湖江合處  
水分青黃二色崖

劈十尋天色夜江含萬籟客心秋風清陔覺虞韶作石怪

頻疑禹貢收五百年來輕李渤只因蘇子夜深遊南音函  
胡北音

清越渤言亦不可忽蓋石  
質如此故遇水則異聲也

高皇親此將元戎百萬紅船落掌中高皇帝征偽漢駐蹕  
此山時我用白船偽

漢用絕壁雲煙動奎藻大江波浪起天風英雄不復歸三

戶舛木猶能助八公獨對洪流玩吞吐月明山響怖漁翁

采石磯

采石磯邊飛櫓下斜陽淡淡水粼粼山形怒處蟠龍虎風  
力强時過鬼神天塹舊知南北限夕烽新動楚吳塵一生  
心事中流楫媿與朝廷佐外臣

遊甘露寺

老木陰森作夏寒，岡巒深擁一鵬盤。日邊颿去東流盡，天末雲移北望難。三國旌旗連夕照，六朝臺殿壓風瀾。英雄去後江山在，輸與殘僧抱膝看。

張貞白有離世之志，作四別詩示子，子反其意，作四

留詩以尼之

瓜廬小結在塘坳，城市翛然即遠郊。谷爲愚公甯避辱，亭因揚子不辭嘲。鳴蟬秋盡猶綠砌，舞鶯春深亦認巢。莫愛雲松棲絕壁，山中依舊要誅茅。代廬舍留

曾因一擊悟香嚴，翠竹黃花不受嫌。空際繁華隨意掃，閒中色相逐時拈。經春抱甕新條長，隔日窺園惡木添。莫向狙公分橡栗，尋常山果共酸甜。代花木留

雨雲翻覆世情新，晚節松筠轉合親。老語脫疏應恕醉，濁

醪遷次不嫌真。蔣生自是憐求仲，支遁由來契許詢。莫入

深山友麋鹿，人非麋鹿恐傷神。代友人留

諸門可入是清涼，有酒何須強散場。丈室已空華鬢影，赫根難損麝臍香。天親無著元相友，靈照龐公各坐忘。莫視怨親成一槩，西歸隻履太踉蹌。代眷屬留

送張子石再遊江右

章門憶我別君時，歛見君歸又解維。茅屋閉來春艸合，鈴齋夢去子規知。舟過曲瀨青山擁，天近長湖白日遲。珍重南州懸一榻，少留莫賦四愁詩。

江介鷺花自接連，峭颿何處認歸船。瀧分上下元同歷，月照悲歡已再圓。時侯生文中新沒其尊人雍瞻將歸取道浙溪即子石往豫章路孤舫雨聲溫管夢，高樓春思入新篇。憑君莫憶離羣者，慙負匡廬

又一年

正月三日飲爾宗齋留宿次韻

飲遍屠蘇歲尚新，籃輿衝雨競良辰。  
花香酒釀深更坐，弟勸兄酬古屋春。  
閒覺篇章渾跌宕，醉逢旗鼓益精神。  
夜闌獨對王戎語，木榻翛然布被親。

夏日錢牧齋先生攜同泛舟尚湖

永日扁舟在碧潯，停舟往往得園林。  
一川魚鳥如相識，百態湖山合賞心。  
竹瀾靜通菘局響，荷花閒笑酒杯深。  
紅鏡白月城隅晚，賸伴先生有醉吟。

九日登虞山遇雨宿興福禪院

每到林巒覺眼明，登高況是客中情。  
山當木落先疑雨，院有僧期不願晴。  
敲枕靜聽鐘鼓報，推窗遙指澗泉生。  
可憐一夜清無寐，心在崑峰夢未成。

潭影悠悠日夜空，一霄雷雨氣鴻濛。  
啜茶共說無生話，禮

足還瞻蓋世雄。

僧出紫柏老人象

烏帽白衣真往事，黃花翠竹想

遺風出門獨向秋山笑，身在曹溪一滴中。

送嚴式如遊武昌

楚中風物待清詩，君去樊山酒旗天外振。  
衣黃鶴遠水心題畫，白鷗遲禰衡詞賦留殘照。  
陶侃功名入斷碑，吟向郡西休感慨，桺條不似折來時。

次韻寄酬侯生雲俱見懷

英遊絕境兩無窮，南郭煙雲左里風。  
天際一帆如隔世，崖巔雙袖欲凌空。  
漏卮飲處思曹植，釵腳題來逼魯公。  
老我閉門仍距躍，詞壇角逐羨羣雄。

章門舊雨知予憶，吳會浮雲見汝心。  
愁裏側身堪涕淚，夢中識路暫登臨。  
鴻當急景飛如昨，艸入離亭綠至今。  
擬代黃花與君約，滿城風雨遲車音。

新晴訪桂

西顥晴迴積氣開江皋肅肅下疏槐共傷秋艸迷天路且  
折芳椒向水隈池面日翻寒影去園心風遞古香來興闌  
歸揜空廬莫獨對烏皮一寸灰

訪隱者郊居

隔溪高士坐危亭客有棲尋戶不扃花似嬋娟邀俗賞松  
因扁屨受天刑林閒密果藏飛鳥窗外疏梅亂曙星最是  
道心能及物庭陰病鶴長新翎

張母七十壽詩

百年嘉慶及芳辰愛子持觴冢婦親董氏樵漁方養志茅  
容蔬果更畱賓管彤自接青氈舊機杼常隨白髮新萱艸  
榴花相對發霓裳冉冉下鸞輪

壽陸春園六十

已去風塵未住山莫年幽事滿荆關家居萬戶侯封內人  
在西京儒俠閒青玉案邊椎髻古黃金花下舞衣斑祇應  
便與林泉約賒盡清娛占盡閑

贈時用咸入泮

國士門風邁等倫明經童子豔翁人文從試席看叉手書  
向壽生憶等身出穴長離光照灼倉牛乳虎膽輪囷吾衰  
浪附通門雅恐與圃馨作後塵

壽潘汝躍六十

鶻冠何意老邱園祭酒諸生眾所尊皇甫已尋高士傳仲  
長豈羨帝王門一經注就畱兒讀儋石空來不自言見說  
琴書詠三樂祇應秋月滿閒軒

和龔儉化寄懷原韻

午夜熒熒對影寒客心展轉思多端甘拋松桂周旋久自

識風霜閱歷難蝸殼壁枯殊失笑羊腸路轉且爲安忽來  
嶺上梅花信驚起挑鐙仔細看

歸與欲賦託空言生計羝羊困觸藩滄瀨未能怡白髮泉  
臺無計慰黃昏雞鳴似欲回殘夢柝擊頻教亂旅魂若問  
羈愁何處劇夕陽影裏望江邨

和龔仲和登高原韵

征帆十里挂澄湖搖曳斜陽遠欲無鴛去長空隨鶴鶴浴  
來同伴問鷗鳧不嫌日蔽交陰重偏愛臺虛趁客孤回首  
登高餘興續那知壽路已荒蕪  
生涯漁釣滿江湖千古升沈事有無何限溪山羣覆鹿不  
妨天地任歸鳧臺高獨向蒼茫立日極空涵意象孤落木  
洞庭波澈底蕭蕭汀畔盡荒蕪

新春喜葉石農至

冬杪相期及首春春風送到剡溪人門經積雪寒猶在酒  
出貧家味較醇高士有懷觀物變賤儒何力救時屯一尊  
坐對釭花落消盡胸中十載塵

鸞語知春劇可憐簷梅索笑亦幽妍客來扃戶如逃債君  
至論詩似學仙大雅千秋幾寥闊故人今我兩周旋釀金  
鑄得鍾期否商到遺文共惘然

時料揀閱  
裴村遺稟

春風

柳向西偏一綫斜東風嫋嫋自天涯捲開白月初消凍閣  
住輕陰爲養花駘蕩祇堪嬉燕雀顛狂莫遣動泥沙陌頭  
吹得韶光去獨有羅敷最歎嗟

春雨

幾日春光到眼明鳴鳩聒聒又嫌晴霏微自潤花間色沾  
灑虛間葉上聲蚯蚓上階如得意筍萌穿地欲妨行底須



把滑登山去小艇橫波也有情

讀鄭思肖心史

一夕匡山卷陳雲百年吳會泣斯文人間再見陶徵土地  
上元無滄海君心入漏泉終化鐵氣填溝壑亦成墳千秋  
萬古靈均意只有西川杜宇聞

送張子石遊燕

時朝議嘉定復漕  
子石以伏闕入京

紫芝一曲舊菰蘆又入燕京問狗屠卿相未堪呼佗友流  
民只欲繪爲圖清談藝苑摧黃馬長策中原獵短狐他日  
平臺訪遺逸應知世上有郇謨

荒城百里絕炊煙累繭煩君獨顛天轉漕去更無韓滉米  
治衰惟釀沈郎錢空江蟹斷孤舟外長路魚星匹馬奔見  
說南司新抗疏不須張日向時賢

過露筋祠口占

白鳥猶疑點露光青松長與作幃房玉埋地底終辭污菊  
死枝頭尙抱香薺白有碑詞黯黯投金無瀨水茫茫翠旂  
明滅知何處巾幗如林最可傷

京邸送龔智淵南歸

時智淵就選  
爲秀水教諭

總是劉蕡迂選場也應庠序有輝光袖歸綾刺投官長擊  
碎胡琴出帝鄉家似朗陵傳孝友學依安定舉條綱管賢  
晚晚猶卿相況爾虬鬚亦未蒼

書劍偕君客上京還憐客裏送君行鼻盧得失元無據雨  
雪雱涼共有情關出穆陵黃葉暗驛逢清口白波明新詩  
好爲題茅店我到應知隔幾程

時子將請  
假南歸

喫黃芽菜作

畱帶京華噉菜根調治火力似蒸豚芳鮮花乳堆磁盃滑  
輒油酥沁瓦盆倉罷總令腸胃實味回無復筍蔬存山中

舊業曾爲圃屬釐清風是國恩

南還至杜生邨阻雪王孟衍見示所和坡公鹽字韵

詩次韵八首

車中集霰尙廉纖茅店俄驚朔氣嚴似兆豐年將比玉如  
憂旅食故堆鹽林邱掩冉通孤寺燈火青熒隔小簷卻憶  
君家三泖上竹巾芒屨看峰尖

欲去仍迴舞態纖斷篷高卷助威嚴隨車剡剡鋪成席控  
虎晶晶變作鹽吹面未消欺薄酒壓巾能折湊卑簷無人  
冒學袁安臥說向東風馬耳尖

簾幕爭投不厭纖閉門聊復阻深嚴解將燕市虛堆麪未  
與吳尊實下鹽擁被陡驚寒折絮攬裘誤喜月生簷明朝  
大地陽和動埽出坡陀放出尖

次日爲長至

闊劍長鎗勢不纖蛇蟠鶴舞陳方嚴黃池夜噪天如墨白

帝朝屯峽似鹽墮指竟須憂絕塞映書誰復耐風簷天涯  
賴與王猷值收拾瓊琚付筆尖

亂敲天花密且纖坐來塵界得莊嚴不畱色相仍生豔能  
舐虛空盡是鹽寒氣帶暄回土室莫光連曉入冰簷冷然  
萬玉吾肝肺鼻白何勞看一尖

融融皜皜月華纖禁斷微塵亦太嚴妙染誰能勝摩詰妍  
辭終類刻無鹽棗林冰敲花千樹檉柳風團絮一簷天遣  
吳儂看朔雪等閒裁翮出新尖

謝庭高唱脫纒纖坡老還爭筆陳嚴愁至詠詩挑朔雪興  
來酌水味吳鹽蕪城冰柱衝驟馬破驛風枝瀉屋簷戲問  
屠沽能解否百曾錦繡裹山尖

郢唱非同下里纖吳儂也復亂清嚴詩工不值一杯水人  
好應酬幾兩鹽君奮白鬚籌朔漠我歌黃竹盼窮簷相期

躍馬收淮蔡，官負風斤運鼻尖。

孟衍有詩見和復疊韵

牛腰雖怯管城纖，綺語終輸白戰嚴。若也浪題詩是錦，何殊誤指雪爲鹽。寒吹宿火燃衣帶，靜寄歸心算屋簷。勞動灞橋驢背客，批風抹月用豪尖。

雪晴早發杜生村至李家口疊韵二首

指直難抽韉系纖，僕夫湯沐已晨嚴。水生欲助鬚如蝟，氣出堪憎笑似鹽。一徑鴉叉迷古埭，萬條鶯管插荒簷。關河凍合酸風緊，仿佛沙場射鏑尖。

映日凝明魯縞纖，兼霜的皜劍花嚴。藍田煙去唯存玉，滄海潮枯盡煮鹽。混合路歧埋棘刺，分疏雞犬認茅簷。遠山誰是華，不注我欲飛身石筍尖。

一陽生處力猶纖，陰氣憑陵忽解嚴。高岸白消撞玉斗，凍

河青出轍形鹽。喜尋黃獨愁無逕，苦憶江梅笑滿簷。關塞漫漫誰奈汝，簷肩不覺似山尖。

臨朐道中微雪復疊韵

晴林霏雪故纖纖，裘點齊城氣色嚴。已障高邱成白壤，將消曠日作紅鹽。吟垂鼻涕冰衣袖，睡放頭風宿帽簷。稍喜征車入圖畫，穆陵關外數峰尖。

遣興

萬里霜風笑凍蠅，一囊詩句類遊僧。新添袍笏兒童喜，漸忍飢寒僕隸憎。車裏炙瘡狂趙壹，樓頭湖海老陳登。自知合受東山誚，便濯塵纓也未能。

道翁見出獵者

楚製衣衫箇箇輕，晴雷知是拓弓聲。塵當駿馬來時住，風向豪鷹怒處生。繞出林叢齊掩抑，梭開原野各紛爭。鷄棲

車裏回頭望一道飛毛雪片明

觀逐兔作

黃蒿白草遍齊東兔窟經營在此中野老側身來似鬼韓  
盧點首去如風材高竝鶩難空返敵狡窮追易見功立馬  
縱觀悲世事平陽血戰亦英雄

宿遷入舟作

笨車羸馬倦歸程乍入舟航似醉醒天落黃河無日住雲  
浮吳會有時停馮夷縹緲親椒酒風伯招搖過壩鈴日送  
波瀾成獨笑一杯吟與白鷗聽

瓜洲阻風遇雪復疊鹽字韻

東風五兩白纖纖浪急沙鳴萬騎嚴訪泊正逢山似畫計  
程爭柰倉無鹽衡門翳翳陶潛酒江樹垂垂杜甫簷不見  
古人唯見雪壙鈴遙語一峰尖

哭程孟陽先生次金爾宗韻

生死茫茫總別離魚書才到訃音隨雕零耆舊今方盡談  
話風流轉合思羸博祇將魂氣接粉榆先與首邱期大招  
何事偏稱宋唐景由來悵所師

西州陳跡黯悠悠淚滴遺文不自收譏評去聲小詩如法律

提攜晚進勝同遊松圓閣在苔應滿花信樓空月自流獨

有禪心將得去幻形真作渡神舟真語形爲渡神舟泊岸

將辭去先生晚年棲心

過魯遊沂水上慨然有作

清沂映雪晚無波閒詠思偕點也過落葉覆橋沙路細夕  
陽平岸野煙和巢鳥歷歷飛鴻盡獵馬蕭蕭脫兔多水鏡  
似將行客笑兩行蓬葆一青騾

寄懷鄭超宗同年

郭隗臺峙客少雙雄談清夜接塵幢詩分稟艸長畱篋酒  
挈餅罌屢過窗歸騎聯翩真似雁春愁浩蕩有如江因風  
爲問山齋樹多少新陰覆石缸

子嘗和君  
憶椽樹詩

偶棲卓錫菴次程偈菴壁間韻

松門菝岸老僧居到此心除境亦除塵夢已隨風籜遠慧  
香長與日光初沿溪自試撐船手布席分看鬪艸書苑是  
林棲向居士東山何用再躊躇

長至日再疊詩韻

舊貧長戀子雲居不與門庭共掃除風颭幃鐙蕉破後雨  
飛藥院艸生初看多世變如春夢憶到詩篇似誤書牘有  
清愁消未得日長一綫倍躊躇

甲申除夕感懷次廣成先生韻

風雪南轅憶去年河山北望淚如泉戈揮白日真無力扇

隔黃塵也自賢事業雲臺新宛洛畫圖督亢古幽燕山中  
老宿閒談話擬續離騷一問天

廡廟江湖事百端侵尋已覺歲華殘長鯨自合翻溟渤倦  
鳥何心刷羽翰家計總輸漁具穩侯封那敵醉鄉寬海翁  
舊話君知否一與鷗盟更不寒

乙酉元旦次廣成先生韻兼呈雍瞻

薄陰微雪晚開天輒語深杯互接聯嬾慢那能拘禮數飛  
騰只合餞流年煙吹小墜梅香動露溼平皋蕙葉眠獻歲  
有懷誰賦得謝家兄弟擅新篇

六日對雨再疊詩韻

破屋朝來仰見天生憎雨腳太繚聯龍蛇脈脈知春氣花  
柳遲遲識閨年閱盡後生相次老看多世事只思眠從今  
會得逍遙義別著南華內外篇

附錄卷二十一  
三  
眉聲座上見翼王和元旦詩復疊壽韵二首

淮左軍書欲揭天江南風物尚蟬聯黃塵一浣燕山雪絳  
幘重瞻建武年張鎬已甘窮谷老陳登冑作下牀眠知君  
興寄椒花外大筆摩厓有頌篇

酒人跌宕欲忘天興至聊賡一兩聯潦倒未須憂白髮亂  
離猶得見新年臨流白帽清堪畫帖地籃輿倦卽眠山鳥  
山花日堪惱春遊還有杜陵篇

新春喜陳嘉白婁東至

春江容易拔船頭小艇東來恰順流艸色苔痕門徑淺蔥  
湯麥飯主賓幽清言斐疊晨將夕古意蕭條樂更愁稱載  
卻看垂橐去停雲靄靄思悠悠

海上扁舟棹月還踏歌曾叩野僧關文章屢見知精進歲  
月頻移覺等閒鶯喜新年聃出谷猿尋舊侶故依山春風

似識潛夫意點注簷花盡破顏

語及君臣涕淚俱上牀堅臥欲何須風塵瀕洞驚幽獨衿  
佩春容礙走趨野飯雕胡收滿屋水田諸蔗種成區山中  
鄭敬飄然往將子能從亦可娛

送陳元晉分教歙縣

澤國春生水接連鶯花相送上瀧船青山障日如過峽黃  
海鋪雲欲互天地雜駢剛從教速官饒紙墨著書便綱常  
腐爛嗟今日經義還應仿管賢

陶菴集卷第二十終

順德龍鳳鑣校棊

陶菴集卷第二十一目錄

五言排律詩

歸自南都詠懷四十韵寄呈侯豫瞻銓部 孫母沈  
 宐人六十壽詩三十二韵 壬午元日對雪二十韵  
 座上賦得石壓筍斜出二十四韵 孫孝若招同  
 諸人觀梅臥雪亭次瞿給諫稼軒二十韵 宏光改  
 元感事書懷寄錢宗伯五十韵

陶菴集卷第二十一

五言排律詩

歸自南都詠懷四十韵寄呈侯豫瞻銓部

壯齡疏世務早歲慕文章跌宕三冬久僮仞百畝荒燃松  
 明夜火所爍拓晨窗未覩元文就空令白一作素業妨老親  
 憐疾病良友念行藏勸勉趨場屋支持裹一作共糗糧放船  
 梅雨綠問店變秋黃陵寢瞻佳氣溪山醉雜光書時頻嘯  
 詠壓韵互雄強稍就秦淮月俄依漢署香羈愁渾撥棄新  
 語得商量炎厲何其甚微軀未覺良帖經殊漫漫對策頗  
 琅琅刺滅禰衡袖錢羞杜甫囊臬盧隨六博聚散各參商  
 下瀨一作水征帆峭徂秋容貌蒼避人行故里排草入深堂  
 已報劉蕡罷誰知趙壹傷同心贈丹棘閨歲厄黃楊去去  
 懷吾道寥寥恨未央秦中阮并沸塞上肉猶瘡米賊終殃



漢花門必一思作一既唐民生半豺虎國論一久一作一蝸蟻濟物

吾何有憂時意漸忘一漸降一舊貧唯錦里新好亦柴桑易

卦編仍摘戎韜卷在牀調治平丹竈輒芟翮葛覃長飲用

恆常醉愁須澹泊湯更看時涵濁一所恃鑑一道一精詳

求瘼間當一知人總大綱妖氛應蕩滌雲漢伴光一芒一大角

必一光一日者偕吾友論文及令郎著鞭驚一憂一士雅閣筆歎

元常星聚連三月蓬飄遂一方慵魚顛既曝健鵲翅徒張

游想竹林興景看萸菊芳翎鳴龍虎在風卷一作一鶴鴿怵

奔否登高日歸與舞綵將元除霜欲一漸一落烏橋一白一下一氣

先涼惆悵觴難御裁詩報一對一夕陽

孫母沈宐人六十壽詩三十二韵

忠孝清門事悲歡壽母筵皇天心似鑑良史筆如椽夙管

蘭閨內經承姆教先緹縈情最苦德曜志何堅箕帚歸袁

隗柴車挽鮑宣蘋蘩供婉嫕機杼出煩擱夫子方憂國單

車獨首燕筋籌南越糸筆換祖生鞭躍馬金源塞咎兵木

葉川危城嬰雉堞飛礮貫狼煙此日聲名大將差管葛肩

身畱天北角冢在海東邊辛苦憑閨範艱危寄奉錢桁懸

新翟蕩裘斥舊金鈿倉淡踰甘蔗懷清戒盜泉豈唯成閫

外亦以奉堂堊廟社雙鼉鎔疆場一李全毒搖齊魯境氛

合一天戰壘啼妖鵬忠魂泣杜鵑竟聞歸樸馬不見賜

犀軒青海銘誰勒蒼生涕盡漣未一邘一忍一此一地一下一欲一從一焉

念有尊章在兼為子姓牽花明長濺淚髮白不由年盥浣

儀無闕丸熊教屢遷手封三馬鬣家贖一青氈坎窞時還

過松筠算合絲鞞絲開甲子鸞鶴降神仙楚楚思堯事跋

跋看後賢白華方有迹銀管遂成編事久公評見誠存善

慶延吾從世講末長語謝雕鐫

壬午元旦日對雪二十韻

正旦存餘臘同雲比慶霄半明先應朔萬玉下崇朝入戶  
方沾葦侵盤恰點椒輕輕仍作片密密故封條柳動俄爲  
絮梅新轉學嬌秦韜玉雪詩紫放鳩同豔曳映綵各招搖  
客至還披篋尊開更索貂雞須銀畫帖燕合粉圖綃漏洩  
春光甚句留朔氣饒形鹽裘富貴市麪笑虛囂比屋袁安  
臥彌天穆滿謠銜枚誰入蔡墮指獨思遼占驗因三白憂  
愉判此宵追蝗過糞壤積穀賤瓊瑤有喜祥風至漢天文  
風爲止歲是日無心六律調披雲斜景見吹面薄寒消漸  
風從東北至志東北放鬆枝直真如鶴毳飄青邊煙起爨潤處麥生苗呈瑞思  
元造勤民荷帝堯賦詩慙郢倡歲盞或堪陶

座上賦得石壓筍斜出二十四韻

山骨誰能斲龍孫氣力殊遮藏千仞厚迸坼一雷轟抵隙  
爭分寸乘時利走趨風吹難解籜雨溜易垂珠蔓草低相  
掩垂藤誤見拘安排成列桷擻掖象交蘆角立牛羊舐牙  
磨虎豹軀題書斜架筆飲羽倒抽笱蹶蹶高山仰蕭蕭逐  
北徂循牆正考父棄甲銳司徒葭倚誠非伍蓬生歎有扶  
冠峰皆秀出拔地獨崎嶇因勢資奔峭潛身避剔劓折來  
猶負直遂去或如愚月射雲根遠泉迴洞府迂爬梳稚子  
拙握進野人叻詎有驅山鐸難求叱石符圓仍慈母竝大  
與衛邱俱歷落尤多矣檀欒有是夫變蛇終矯尾爲馬定  
過都偃蓋古松敵當門香艸輸高須名箇籜短亦異王芻  
物理存貞正人情積歎吁上番來竹下睨視極形模

孫孝若招同諸人觀梅臥雪亭次瞿給諫稼軒二十

韻

寂寞書空久經過唾地傭東皋移勝事北郭散幽踪載去

扁舟好攜來百末重盃諧語笑傾蓋忝遊從初旭浮波  
彩殘冰綴岸容白邊明一徑青處失羣峰入戶無畱屐巡  
簷七倚筇房廊新蟻領茶鼎野猿供望遠能生思收春併  
入胸折來知影瘦飄去使心忪搔首煩花匠埋憂對酒龍  
人偕山峯嶺樹倚玉玲瓏坐媿琅玕贈談增琥珀濃長城  
尊五字名飲敵千鍾披豁良朋意疏狂野客踪再三唯譽  
樹百遍踏纖苔林表凝高晝庭陰報下春艇搖藤澗影風  
遞頂山鐘興異剡溪盡詩如灞岸逢相將畱片月卻挂艸  
堂松

宏光改元感事書懷寄錢宗伯五十韵

禾黍宗周轍衣冠建武年寅清三禮貴耆艾五朝賢聽履  
楓宸迴循陔萸葉遷瞻依同日下淹臥自江邊管歲登龍  
忝郎君麗澤專南垞燈火屋北涓宴遊船奉手評豪素開

廚出簡編文瀾增拂水詩壘壓松圓酒發公明氣談鉤向  
秀元賞音存寂寞延譽許騰鶩精舍畱二載陰符練幾篇  
厭貧將嫁衛躡躑遂摩燕刺滅禰衡袖囊空杜甫錢艱辛  
名字播崩迫世情偏憶鱸秋風起騎驢莫雪旋方期遊綠  
野仍擬借青氈未信吾何仕知元意必傳睽違丁喪亂悵  
望阻階緣家國雙胡廣疆場一李全丸泥秦事壞首鼠漢  
臣愆御膳供糜粥京城墮紙鳶陷牀驚玉座失涕到銅仙  
戮辱疲巾幘奔亾相馬鞭地將翻□□鬼欲立黃天代邸  
蒼龜協韓原怒氣填荆榛陵廟泣烽火蠟書遄夫子纓冠  
往蒼生屬日先波難搖砥柱日遂夾虞淵慷慨紆籌策雍  
容委事權屢持宣室席始踐玉堂旃北斗南唯一東山出  
倬然從繩資直木調瑟待安弦禮樂今僵仆瘡痍夙蔓延  
三微危欲盡萬姓厄堪憐寂寂思鳴鳥滔滔泣逝川若爲

陶菴集卷第二十一終  
凝化理歟爾正埃埏逆骨春為粉凶臍炷作煙驅除□□  
難滌蕩版圖迢組帛人胥給租庸戶得蠲活碑文刻畫淮  
雅筆雄妍此志終成矣明公道在焉不材慚樗櫟無意忝  
班聯歎段駟騎馬槎頭漫釣編條桑春社靜抱甕夏畦瘠  
對物全甯澹從心得靜便稍能窺浩浩豈敢守彘彘碧艸  
無情極青門有夢牽五雲飛曉靄獨鶴舞蹁躑問訊憑書  
驛關心是杜鵑休論出與處萬事荷陶甄

陶菴集卷第二十一終

順德龍鳳鑣校棊

陶菴集卷第二十一目錄

五言絕句

月下口占 過彭澤 座上詠弓 坐友人園中偶  
題 對雨

六言絕句

無題

七言絕句

田家 竹枝歌 閨思 馬當山感王勃事 夏日  
戲畫三扇因題二絕句 田家 竹枝歌 塞下曲  
宮詞 閨思 除夕戲占 哭閔裴村 哭侯生  
文中 與金爾宗許子位卽事聯句 西山看梅和  
老杜江上尋花七絕句 呂公堂 高郵 客中與  
龔智淵登高 長安與龔智淵聯句 庭中有胡桃

附錄卷二十一  
樹一株方夏爲細蟲食葉濯濯可念旣而有萌至秋  
反成新綠他樹憔悴此獨蓊然因題二絕句 題畫

乙酉仲春同侯廣成先生入郡西諸山探梅遊陟  
三日勝處略盡舟夜與研德雲俱共讀坡公梅花詩  
因次韵十首

陶菴集卷第二十一

五言絕句

月下口占

愛此金翠光招月到林薄昨朝桂花開今朝桂花落  
海上碧雲盡秋天開素屏懷中餘絲筆無處著丹青

過彭澤

滿目傷時運何心傲督郵南昌有梅尉同是挂冠休

座上詠弓

擬處秋毫準彎時二石強木心元正直持汝獻文皇

坐友人園中偶題

蒼蒼綠溪去竹樹自深淺好風如有情迴復不知返  
燕子繞林戲啄將紅杏飛春風吹去緩接著更銜歸

對雨

天拔遠山貌湖添欹樹痕移牀就殘菊醉此蒼煙根

六言絕句

無題

放誕風流卓女細酸習氣唐寅人間再見沽酒市上爭傳  
賣身

月雲曾迷楚國一笑又傾吳宮花底監奴得計鸞篋畢竟  
輸儂

人言北阮放達客謂東方滑稽情不情閒我輩笑其笑處  
天機

子美詩中伎女岑參句裏歌兒彼似青蠅附驥我如斗酒  
聽鸞

千春不易醉飽百歲貴行胸懷羨馬爲憐神駿燒桐亦辨  
奇材

鯨鏗已肆篇什鰲咳從教詆訶百斛舟中穩坐千尋浪裏  
無何

七言絕句

田家

溪南柳古麥風吹跨得烏犍入艸遲手挂漢書牛角上縱  
談劉項與人知

鋤瓜打麥半成閒社案中閒有往還頭白不曾離畝畝只  
疑城市勝田間

田泥深處馬蹏奔縣帖如雷過廢村見說抽丁多不懼年  
荒已自鬻兒孫

竹枝歌

鷓鴣鷓鴣飛無數紅白江花開滿煙十歲吳兒會搖櫓一  
江春水碧於天

東湖西湖蓮荷開一日搖船採一迴蓮葉田田無限好只  
因曾見美人來  
闔閭城邊月照人眞娘墓上艸鱗鱗英雄兒女皆塵土忍  
放香醪不入脣

閨思

柳條不繫玉蹏騮拗作長鞭去路賒春色也隨郎馬去妝  
樓飛盡別時花

馬當山感王勃事

鬪雞檄就海南來猶有雄文對客裁一日長風千里閣世  
閒唯有鬼憐才

夏日戲畫三扇因題三絕句

蝴蝶莊周兩不知涼風吹夢出虬枝料應輒得圖南訣睡  
到山中暑退時畫山中偏袒睡者

松下風吹酒不酣鐘籠一曲正孤拈馬融去後知音少對  
月停杯只有三畫對月吹笛倚置酒鏡

壺盧酒盡過村墟腰腹寬如合抱樗睡眼騰騰君莫笑從  
來牛角不安書畫醉士騎牛出林薄中

田家

五月桑梯倚屋斜蠶絲抽盡響繰車長腰紅女誇身手織  
作還兼吉貝花

竹枝歌

吳酒傾盆色若無河豚味美壓秋鱸狂夫得醉且須醉十  
五小姬花下扶

塞下曲

關榆落盡雁聲稀一望龍堆雪亂飛軍士向南呼萬歲天  
家八月賜寒衣

黃雲如岸壓孤城邊騎千羣夜扎營衣帶自書忠蓋字健  
兒雖死貴雷名  
匹馬沙場喚鬪來三時殺氣貫重圍翻身一箭穿雙鶻追  
騎如雲盡卻回  
雁門秋曉角聲長潼酪新開酥酒香羅紗東頭無牧馬驛  
弓白羽射黃羊

宮詞

金輿行樂泥光輝風揭雲韶天上飛怪得御舟優諫少內  
庭章奏有賢妃  
十三世奉掖庭中天子親知筆札工近試守宮曾作論銀  
章三品賜梅紅  
盤龍高綰麝煤光暈淡雙蛾半額長生被六宮傳學遍別  
翻妝點侍君王

日南天北拱長安一統車書際會難馴象火雞新入貢宮  
監傳寫畫圖看

閨思

苜蓿峰邊明月秋玉關常照古時愁男兒腰下須龜組切  
莫加封定遠侯  
斷鴻殘月夢金微橫笛聲中怨曉幃塞上胡笳應更切狂  
夫自是不思歸  
錦段回文窄窄裁多時鸞鏡不曾開侍兒忽訝調鉛粉昨  
夜漁陽有夢來

除夕戲占

鑪火微紅臘酒香笑攜詩卷坐空堂文章自古無憑據閒  
與三彭細細商

哭閔裴郵



家世耕畬海岸東半拋田畝爲詩工死時幾米存倉內笑  
倒邨南襪襪翁

籜笠遮頭雪片麤長年妝點夜歸圖裴邨自畫已像  
作風雪夜歸圖不知  
地下稱才鬼可有陽春得到無

白頭吟詠沒蒿萊身後名成也可悲一卷殘詩終在手心  
肝嘔出欲遺誰裴邨臨沒手持  
其所爲詩不釋

黃河碧海更難言溪澗潺潺總一門莫道光燄歸李杜便  
驅郊島出乾坤

哭侯生文中

吳苑別來花萼背章門望處白雲屯可憐鄉黨淒其日正  
是天涯語笑辰

箕尾妖氛累月纏北來千里斷人煙多君清夜看乾象只  
在元冬屬續葑

夜闌鐙燼落虛堂細雨疏花引話長半醉起爲鸚鵡舞鐙  
陰鬼伯笑人忙

待汝如炊五斗黍逢人那得一刀圭卻想冥途夔魍魎聞  
君祕咒等聞雷先是日者謂文中云木石之怪爲孽憂在  
此冬其言竟驗而沒時則端坐持梵語

友生伏地盡悲嘯蘭艾彫枯等作泥書策自畱兒子讀銘  
旌卻付老人題

書籤藥盞不曾閒淡泊儒門合斬關萬死得來終有用六  
塵飛處坐如山

偶呼君字作文中大比河汾尙不同再得十年仍是天元  
經或可耀無窮

詹尹拂龜曾再卜令威化鶴已頻遊刀匕利滅成何語火  
續鐙燼各自謀

一昨秋風病未蘇汝曾憂我幸無它比來哭汝添心疾不

見人憂可奈何

遮須何必生曹植蓬島應難舍戴洋欲賦招魂無渾則樂  
文中見夢於其家云  
和終竟在何方  
今方在樂和之境

與金爾宗許子位即事聯句

東墅西城見蚤花爾宗相逢同調破年華蘊生不禁春艸  
依人綠子位故把風情託酒家爾宗

春光欲半始梅花爾宗況復窗筠見月華蘊生不是翺簾

同一醉子位可能無負野人家爾宗

西山看梅和老杜江上尋花七絕句

黃師塢是吾家有恰有蘇端是酒狂一朵花開儂亦看不  
分樵逕與僧牀

棕亭藥院繞湖濱山鳥山花占斷春湖上老人亦可笑梅  
花不看看遊人

萬條寒玉裹山家兼有棠花與杏花淡白竊丹隨賞愛初  
英晚節異生涯

山家土銜冷疏煙瀟茗畱賓也可憐笑指軒窗最高處傾  
銀注玉好華筵

香溪橋西鄧尉東千樹萬樹搖春風料得李生難寫染花  
光豔豔日初紅

蒼藤翠木暗深谿崖腹花高水口低新蝶領風隨意舞怪  
禽爭樹不成啼

久與梅花成息壤疑也拏舟俶也催至竟避花如避債祇  
應花為老夫開

呂公堂

夢醒來看夢裏身百千億夢指為真黃梁自是藏烏喙五  
百餘年更誤人

高郵

鷓鴣橫平野盼風塵馬蹠殘冰逐路人一曲清淮古城下漁翁搔首看斜曛

客中與龔智淵登高

一肩襍被值途窮忽漫登高逆旅中千里暮雲飛不住故山同指雁聲東

長安與龔智淵聯句

萬里中原付夕陽江東雖小足稱王虬髯自向扶餘去珍重臨安當汴梁

楊花飄泊歎無家燕子依人感歲華同向東風嗟薄命傷心原不為琵琶

庭中有胡桃樹一株方夏為細蟲食葉濯濯可念既而有萌至秋反成新綠他樹憔悴此獨蔚然因題

三絕句

已訝飢蟲似雪霜俄迴寒露作春陽道人戲撫庭柯笑疾疴真成卻老方

譽樹從來譽綠陰婆娑也復見陰森如聞老樹為人語賴是蟲來不食心

一番搖落一番愁轉眼須遭兩度秋不見南山霜雪幹火雷燒後似青虬

題畫

深山客至艸亭空只有春雲滿谷中白鷺對飛看不見一時溪雨響淅淅

乙酉仲春同侯廣成先生入郡西諸山探梅遊陟二三日勝處略盡舟夜與研德雲俱共讀坡公梅花詩

因次韵十首

陶菴集卷二十一  
十一  
噉噉日氣乍晴和嫋嫋東風拂面多萬樹梅花君不看一  
聲唬鳩柰春何

曲池行盡見高臺無主梅花次第開種得此花成樹後幾  
人白骨變青苔

遊戲人間老萬回口如布穀不曾開眼弄指與梅花看不  
負千山得得來 指剎師

空香冉冉落匏尊花氣霏微夜氣昏冰雪不畱姑射色陰  
陽難定洛如魂

老幹如虬懶作花清波白月共疏斜阿誰取次能描貌鐵  
石心腸有宋家

雪勒冰欺合晚開干聲羯鼓未能催海紅一樹花如繡牽  
惹紅裙拂地來

鉤翰路畔苜苜樹合杏峰弄細細枝狂發祇應先乞命詩

窮不獨要尋醫

日射湖光寶永飛清冰的皜敲瓊枝夕陽芳艸煙中路記

取藍輿過去時

侵陵謝院雪花輕刻琢唐昌碎月明料得雪消兼月上亭

臺高處不勝情

溪橋踏月過山家風露離披斗柄斜半醉半醒疑夢寐賸

畱清影付梅花

陶菴集卷第二十一終

詠蘭

一叢花氣自清新  
七椀茶香互主賓  
水裔風來疑有雪  
林中月上更無人  
橋刺藤梢更不除  
穿林渾忘繡衣裙  
自無九畹滋芳澤  
縱使當門亦不鋤  
露裏風吹繞砌翻  
刀裁取向妝臺左  
家嬌女憨生□鬪  
艸還枯綠葉猜  
離披花葉總無多  
風半奇姿畫得麼  
一段幽鮮還比似  
湘君渺渺洞庭波  
昔日吳宮罰采香  
館娃人去艾蕭長  
清貧仲蔚開瑤圃  
高臥矜他南面王  
寒梅有格終非俗  
修竹無香也自真  
二徑羅香雖小艸  
一編跌坐是佳賓

一莖一葉拒浮埃風蝶娟娟不敢來手引石泉清見骨花  
 根日灌兩三杯  
 眾艸同生最不平水邊林下任無名  
 浣花詩老幽尋得不  
 向階葍歎澁明  
 春入芳洲發舊根放臣千古泪猶存  
 卻看野艸迷天路歎  
 息歸來欲樹萱  
 有客曾攜孔子琴倚蘭一操古猶今  
 折芳未贈盈懷袖  
 薺麥青青只自深

順德龍鳳鑣校棊

谷簾先生象



後學汪鸞翔敬撫

陶菴集卷末 谷簾先生象贊  
 知服齋叢書

谷簾先生象贊

名高競爽運直亶屯甘節之吉般身成仁年逾弱冠學養已醇從容就義是日德純景此先哲懦立薄敦

後學周文禾敬題

傳

邑後學侯開國撰

黃先生淵耀字偉恭兄涪耀世所稱陶菴先生私諡貞文者也先生少於兄十餘歲既受業盡得其緒論家庭間講道論德往往起貞文所未及邑中少俊未之或先也乙酉六月邑中義師起先生從貞文入城堅守匝月天忽大雨城東一隅崩兵遂大入先生掖貞文至無等艸菴軍聲益亟曰此其時矣貞文西向再拜索筆書絕命詞方畢顧視先生則先縊梁間矣遂縊於其左方貞文自癸未登第歸知天下已亂常鬱鬱不樂先生每以大義慰解之一日自外歸見幼弟戲於庭撫其首泣曰小子何無知時事至此大兄必死節我不忍獨生一家不知若何尙爾嬉笑邪時北信尙緩家人咸詫爲不祥至是言果驗先生之志定於

附錄卷之二  
平日者蓋如此先生之外舅曰王貢生雲程字鵬九年老矣甲乙之際日與親故爲詩酒之會語不及時事至是兵至輒之大罵不屈死妻某氏及二女繫繩於腰牽連入水皆死之長女卽先生之配云又有諸生徐文蔚者貞文之僚婿也先是率鄉勇禦敵於婁塘力戰死於陳與先生兄弟並居西里故附書之

右谷簾先生傳蓋據朱先生九初乙酉紀事陸先生翼王爭光錄節取而爲之者也嘗質之貞文之子雲沼雲沼述方瓢張氏間於僧無等之言曰方先生侍貞文之至艸菴也軍聲甚迫貞文乃再拜索筆書絕命詞先生豫爲纒具懸之梁間出步於庭見紅笠者數騎自城而下先生曰此其時也少需必受辱遂扶貞文以繫焉頭噴觸纒墜地一手尚擎先生拾而冠之遂自縊於右兵

至啟門見一公尸太息而去無等在菴中以方外恠免爲言之如此方瓢名懿實向受業於貞文其說似尤可據云





Blank writing area with vertical lines.

谷簾學吟

古今體詩

夜雨過友人宿

忽欲與子言春風適多暇方晴偶未行既雨亦難罷  
就新陰開尊緩良夜晨興踏西村小隱將學稼

折桂

瓊樹山之幽取與蕭艾伍得近君子壽不辭摧折苦罷焚  
鑪中香行拾松上雨息心棲一枝清夢不出戶

莫秋貽同社

朔氣戒川陸蕭瑟臨青村新寒艸樹變靄靄浮清暎緒風  
結虛幌時菊綴衡門年志難久持感慨以煩冤夫君幸同  
愛款曲相與言贈之瑤與瓊佩以明深恩終然勗古處興  
寢期勿諉

索居喜諸子見過

朝旭斂煙華庭階獨行跡春鳥遺好音冰苔見古色讀書  
觀曩賢或語或復默時節往朋舊提攜散愁疾芝蘭各自  
芳終恐棄遐僻

田家

禾黍盈疇香邨樹映門綠主人儉且勤雞犬常肅肅棗甗  
餉里鄰芋分遍童僕秋穫敢失時負牆返茅屋城市好食  
新新穀貨相續得錢完官糧餘者爲私蓄貧富各成媿謫  
然自相足緬懷羲皇風庶幾在此俗

秋水

交秋溪水清歷歷見其底木葉何紛紛白石復齒齒靜言  
尋其幽蕭蕭雜葭葦水鳥衝人飛遊魚銜藻起轉入荒且  
寒苔色無乃是遙間漁者歌舟溪莫霞紫

秋興

日落高秋陰依然在空谷靜觀風葉飛遠見歸鳥逐此時  
無與言蕭疏對高木久之山月來所以慰幽獨清籟發古  
松白露下修竹四壁多寒蛩唧唧無斷續所觸象外理俗  
念邈難宿遲遲夜轉幽秋氣爽百目

清夜

微月過竹裏虛窗夜亦深此時清且寂爽氣入幽衿獨悟  
有所念悠然如會心鑑寒清焰小相與發孤吟

古寺

石蘿生紫花佛坐石蘿下鳥鼠巢空梁松風落敗瓦古壁  
欲畱題蒼苔不能寫秋聲歸暮林遙聞誦經者

遊鄧尉徐氏山莊

發地結菁茅空山映虛白簞蓄畱清陰梅花若素積湖光

照心明滔滔滄溟窄西岑極遠目微茫數峰碧東鄰聖恩  
寺窅然喧中寂風裏佛香回若爲往來客蹇連困登臨神  
疲羈鎖坼同遊兩三人喜折登山屐佳境難久留反使心  
不適縈迴出林杪疾去尋幽跡

同龔得初昆季登惠山和坡公韵二首

登山汗如濯清風來迎人疏雨度崑嶺俯見林皋新蹇連  
松徑滑攀礪山屐磷忽然凌絕頂下視無一塵震澤浮雲  
端宿霧浥高旻嗟哉落塵網常與俗爲鄰  
浮雲靄山麓孤煙上林樾青燈湛芳尊色味兩幽絕吾生  
如奇旨一醉萬想滅橫斜任孤舟清淺流明月蓬窗雨二  
人酌酌高興發安得買山資免令徇塵轍

和昌黎秋懷詩

迢迢芳園樹露葉晨蕤蕤秋風颯然至搖落勢難已予懷

正悵惻蟋蟀偏入目展轉夜未明或臥或復起仰視朝曦  
昇與此亦相似一日不再晨時駛安可恃感歎千萬端沈  
憂惟一軌何以見曩賢一觴且歡喜

白露萎百艸松柏不彫悴貞隱本性成不由時與地寒蟬  
聲已寂秋蟲鳴自恣語默有不同適時固無異我興觀物  
懷慨然知我貴

秋氣何蕭蕭野情空曼曼纖絺常不完三旬九遇飯飢寒  
非可樂溫飽詎足願孤燈湛空尊對影還自勸左右陳良  
書曠如閱吹萬誰當餐此味芹美不可獻勗哉東隅光桑  
榆乃多怨

蓐收清西陸雲氣高淩淩悲哉秋蟬號癡甚窗罅蠅時去  
心尙爾徒爲俗所憎不見摩空鷗眾鳥欽風稜飛飛遍六  
合橫絕不可罨崩騰各有時蹇退甘無能

白日

仰視白日光皎皎高且懸  
踊躍陽谷中照耀無頗偏  
忽遇驚風飄白雲閉其壽  
天地黯以晦當于入虞泉  
魯戈不及揮義和失其鞭  
陽德豈虧哉明晦亦偶然  
微風吹無力浮雲迷有權  
天道固如此而我何悲焉

飲酒

當空皎皎出素月清輝乍圓  
還復缺我生決無彭祖年  
豈能鬱鬱空憂天眾人皆醉  
我亦醉則予胸中浩浩焉  
三閭大夫何爲者醒然獨臥  
滄江下我來汨羅喚不起  
仰天長歎淚盈把劉伶盡日  
眠酒中醒時雙眼常朦朧  
陶潛攢眉不入白蓮社奉  
杯采菊坐籬東古來達士  
唯有醉求田問舍良可愧  
丈夫負此七尺軀豈能擾  
擾櫻俗累春日村遊發杏  
花冬風萬里飛寒沙此時  
顏色不飲酒坐看兩鬢堆

霜華開我懷揚君眉夷齊當年空餓死  
陶猗亦皆齷齪兒請君置此名利於身外  
頽然終歲無醒時

春閨

春炙繡簾花氣滿暗風梳艸綠短短  
曉鶯破曉驚妾心金鴨香沈畫衣暖  
侍妾勻脂催曉妝鏡中煙柳彈眉黃  
描罷雙蛾爲誰好碎破銅片打鴛鴦

春日山行

陰巖怒石如噴雪處處山家覆松葉  
古藤三月齊作花瘦樹短垣村幾折  
折山僧采茶亦種松松籟茶香一室  
中坐來日淡風亦淡颯然萬壑攢  
犖龍渡溪越嶺殊哀哀山頭後鶴  
時相引潭雲空碧人影稀勝賞未  
窮行遂歸

秋齋坐雨

秋雲突兀起天際疏雨歸落懸  
高空寒潭仿佛細流碧殘

花零落堆蘚紅雨脚濛濛向西去孤鶴散步來長松坐看  
斜景照羅綺須臾萬片金芙蓉

喜崑山柴集勳至

窗下尋書細門壽駐馬輕相看無一語說夢悟三生薄酒  
醉還醒殘燈暗復明同心相會處久與白鷗盟

懷婁東陳靜字

世已無如假誰能識道眞素心聊望古白眼看時人我道  
猶灰冷君情較酒醇沈沈懷抱積何日得壽陳

秋夜

疏影入空牀此時秋氣涼白雲松際雪明月石邊霜蘆荻  
暗潮滿梧桐晚色黃遠聲聽欲近柔櫓過寒塘  
高煙空際平落葉逐時行月滿星河失秋深天地清颯然  
萬籟集默以會微情坐久露華溼猶聞鐘磬聲

舟行

新水正盈盈臨風一棹輕野煙林莽白壞道石梁傾往往  
吟蟬過時時落照明人家修竹裏散髮有餘清

失題

東道煙霜信使稀步看流水念荆扉殊方蹈事多疑畏衰  
世爲人有是非同病尙間河上曲違時終棄漢陰機吾生  
志業存風雅勉事剛修力自微

高衢月落曉寒新榆柳蕭疏望去津圖史同舟聊養疾風  
煙何地敢呈身到家松桂寒幽幌倚棹雲山愧濫巾謔浪  
自矜牙舌在末隨妻子共憂貧

伯氏招燕京王敬哉飲

避地來尋五柳居閒談北事重欷歔天荒地老君身歷國  
破家亡我夢餘世路渾如村酒濁道心還與泛舟虛馮君

降者集卷末  
莫話金門好事到漁樵百不如

東龔得初

久閉重門細艸茸停雲靄靄思溶溶  
蹉跎共被時人笑懶慢還推我病同  
有酒賒來千日醉無錢買得一生慵  
從君自占消愁法已植陶公三徑松

甲申除夕次侯廣成先生韻

卽看曉日又明年愁裏流光去若泉  
冀北天遙成絕塞江南日近賴時賢  
聞雞舞罷悲今蜀聽雁飛過憶舊燕  
長夜悠悠眠未穩解將椒酒送寒天  
今宵愁起亦無端坐到更殘思亦殘  
世貴虎皮迷物色余慙鴻羽斂飛翰  
曉天侵迫冬行促朔氣句留臘尚寬  
會有東風連夜至茅堂雨積不成寒

寓卓錫菴和伯兄韻

避世來尋水竹居相將無事可蠲除  
空階有月閒能看邨酒非泥醉亦如  
與世推排空老世將書滌蕩可焚書  
陶公豈厭廬山社一笑浮橋意有餘

再過陳園卽事

臨風獨往路晴雨淡相因遠樹紅初見  
荒畦綠尙勻籬中過流水竹裏出幽人  
鑒遠寒暄略思深起坐頻廚煙炊帶  
葉鱸美味專尊晚良時促吁嗟人事新  
獨逢俚意外瑣語恃情親酒罷開扉出  
空霜月色眞

卽事

琴終夜遂深客徵主獨酌空香疑有無  
坐對鐙花落

怨情

郎身雖自親郎意不可係素手理瑤琴  
郎聽不言好

憶遠曲

塞上知無暖寒衣六月裁寄書重折看莫使遠人猜  
遣興

晨鐘殷曉窗明月窺獨坐幽階風自來夫容淡如我  
夜坐

涼風落柳梢微雲淡河面懷中明月光多賒不爲賤  
秋夜漫興

倚竹候秋聲聞苔苔明月時間宿鳥驚微風動林樾  
憶遠曲

朔方甯遠近夜夜在君旁鐵馬驚歸處人孤月滿牀  
欲倩秋來雁傳書塞上飛邊庭春不暖切莫解寒衣

秋日閒居  
閒坐清松陰遙看白雲起白雲如孤峰半落青松裏

泊舟虎山橋

春寒風壓酒水滿月平橋何處漁樵客歌聲到莫潮

題玫瑰

新葉煙中冉冉輕香風外離離朱英半染蝶翅綠刺故牽  
人衣

百舌

花共明妝艸帶茵枝頭百舌弄芳春莫嫌此鳥多閒話不  
是人閒掉舌人

詠松

矯矯亭亭骨幹孤風吹霜壓不須扶懸知素有凌雲節  
受秦朝五大夫

詠梅

主人爲愛梅花好時向鄰家買地栽月影破窗二五點冷  
香時遞暗風來



冷淡清幽迥不羣春風開落任紛紛格高不入時人眼雪  
裏間香始識君

夏日閒居

竹裏還兼臥竹樓習書芭葉淨堪收雲來窗薄渾疑雪雨  
散幽林忽似秋

約時去華諸同人泛舟

莫羨槎頭縮項鱖黃魚味美較芳鮮野夫得醉且須醉一  
日清狂當一年

谷簾學吟終

順德龍鳳鏹校栳

偉恭先生谷簾學吟係先生季弟殿雯文學所手授乃合  
虞山毛氏隱秀集詳加參訂錄爲一卷藏弄有年始屬陸  
子扶照登諸棗梨附貞文公陶菴集後蓋先生爲貞文嫡  
弟自幼補諸生天資英敏與直言諸君子講道論德同志  
者咸目爲畏友及從兄正命也年僅弱冠以激烈佐其從  
容以理學成其忠節事載國史家乘傳諸四方士大夫之  
口位置在二程兩顏之間詩歌固其餘事然誦其辭採藻  
咀華金春玉應烏可使之泯沒無傳也乎慨自吾粵文獻  
日就零落據邑志書目及翟氏練音所載自宋訖明以詩  
古文名家者不下數十人今大半不可得見而王徵士集  
刻於宏治時唐婁李程四先生集刻於崇禎時者亦多缺  
燬至若予家五世文集百餘卷陸師菊隱著書數種簡牘  
浩繁尚無力付剞劂氏僅僅錄副以藏每一念及深恫於

懷而扶照至性孝友汲古媿修爲中槎之翹楚初因予言  
補刻王婁李三集并購唐程以及貞文集版整齊印行公  
諸同好復因予言繼刻先生詩以並傳於時其表章先賢  
發潛闡幽之盛心迥非時流所可幾及行將遍訪名家遺  
帙次第壽梓以備一邑之文獻予雖窮老猶將躬許以贊  
其成也

康熙癸未夏五朔旦同邑後學侯開國謹跋

